



## Kandidatu no Nomeasaun Komandante Jeral PNTL

Mahein Nia Lian Nú. 98, 6 Marsu 2015



Relatoriu Fundasaun Mahein Nia Lian ne'e suporta husi povu Amerikanu liu husi Ajénsia Estados Unidus ba Dezenvolvimentu Internasional (USAID).

Vizaun husi autor sira ne'ebé expresa iha públikasaun relatoriu sira ne'e la representa vizaun husi Ajénsia Estados Unidus ba Dezenvolvimentu Internasional (USAID).



Website: [www.fundasaunmahein.org](http://www.fundasaunmahein.org)



## **Kontiudu sira**

<b>Kontiudu sira</b>	<b>2</b>
<b>Introdusaun</b>	<b>3</b>
<b>Metodolojia</b>	<b>3</b>
<b>Esperiensia no Nomeasaun Komandante Jeral PNTL</b>	<b>4</b>
<b>Ajenda prinsipal ba Komandante Jeral PNTL foun</b>	<b>6</b>
<b>Rekomendasaun</b>	<b>7</b>
<b>Bibliografia</b>	<b>8</b>



## Introdusaun

Depois Komandante Jeral Polisia Nasional Timor-Leste (PNTL) Dr. Longuinhos Monteiro nomea nu'udar Ministru Interior iha VI Governu Konstituisional.<sup>1</sup> Husik hela lakunas boot ida iha PNTL nian laran. To'o agora seidak hetan nomeasaun foun ba kargu ida ne'e. Maske iha ninia Adjuntu ka Segundu Komandante Jeral kontinua lidera tuir kompetensia sira ne'ebé hatur iha Lei Organika PNTL nian.<sup>2</sup>

Dadaun ne'e diskusaun namanas kona-bá figura ida ne'ebé maka sei asume kargu Komandante Jeral PNTL? Iha diskusaun sira ne'e tantu husi membru Parlamentu Nasional no sosiedade tomak idak-idak ho nia hanoin katak Komandante Jeral tenki mai husi Instituisaun PNTL rasik.<sup>3</sup>

Maske nune'e istoria hatudu tiha ona hafoin hakat liu krize tinan 2006. Governu nia desizaun eskolla figura importante ida mai husi Prokurador Jeral da Repúblika nomea ba Komandante Jeral PNTL. Altura ne'eba hetan protesta maka'as husi Parlamentu Nasional no sosiedade sivil. Ironiku liu, hetan reazen maka'as mos husi elementu PNTL sira kona-bá nomeasaun ne'e. Portantu figura ne'ebé nomea ba Komandante Jeral mai husi ema sivil no la ho formasaun baze polisia nian.<sup>4</sup>

Ho lakunas ne'ebé dadaun ne'e PNTL infrenta, mosu mos preokupasaun seluk husi públiku katak Komandante Jeral PNTL tenki mai husi kareira polisiais. Portantu figura ofisais sira iha PNTL nia laran barak maka iha kapasidade atu lidera, iha esperiensia komandu no hetan formasaun ne'ebé naton atu asume kargu ida ne'e no la bele mai husi ema sivil ruma.<sup>5</sup>

Nune'e relatoriu ida ne'e nia objetivu hare kona-bá se maka bele asume kargu Komandante Jeral PNTL tuir Lei Organika PNTL nian haruka no ajenda serbisu ne'ebé Komandante Jeral foun sei kontinua?

## Metodolojia

Metodolojia ne'ebé adopta iha relatoriu ida ne'e liu husi rekolla informasaun no literatura sira ne'ebé públika dahuluk ona husi ONG no media nasional sira. Nune'e mos dokumentu ofisial sira iha portal Governu nian no relatoriu Fundasaun Mahein (FM)

<sup>1</sup> Xefe Estadu Simu Proposta husi Primeiru Ministru Indijitadu, Dr. Rui Maria de Araújo, kona-ba Kompozisaun Governu nian. Disponivel iha: <http://presidenciarepublica.tl/xefe-estadu-simu-proposta-husi-primeiru-ministru-indijitadu-dr-rui-maria-de-araujo-kona-ba-kompozisaun-governu-nian/>. Asesu iha loran 2 fulan Marsu tinan 2015.

<sup>2</sup> Dekretu Lei Nú. 9/2009, loran 18 fulan Feveireiru. Lei Organika Polisia Nasional Timor-Leste (PNTL). Artgiu 11) número 2).

<sup>3</sup> Jornal Independente, loran 26 fulan Feveireiru tinan 2015. Pajina 3.

<sup>4</sup> Kla'ak Semanal Edisaun 43 (24 Marsu 2009). Disponivel iha: <http://www.scribd.com/doc/13850066/Kla-ak-Semanal-Edisaun-43-24-Marsu-2009>. Asesu iha loran 2 fulan Marsu tinan 2015.

<sup>5</sup> Jornal Independente, loran 26 fulan Feveireiru tinan 2015. Pajina 3.



ne'ebé pública ona tinan 2014. Konklui relatoriu ida ne'e ho diskusaun interna iha nivel ekipa peskizador sira ho modelu *Security Sector Discussion* – SSD.

### **Esperiensia no Nomeiasaun Komandante Jeral PNTL foun**

Hanesan introdus tiha ona iha sesaun dahuluk relatoriu ida ne'e nian kona-bá nomeasaun ba Komandante Jeral PNTL nian depois krize tinan 2006. Altura ne'eba hetan protestu maka'as husi polítiku sira, sosiedade sivil no lamenta husi membru PNTL rasik. Portantu nomeia figura sivil ida nu'udar Komandante Jeral PNTL.

Protestu ida ne'e kestiona mos figura ida ne'e komete krime balu iha pasadu antes nomeia ba Komandante Jeral PNTL no la hetan prosesu ruma ba aktu ne'ebé nia komete. Konsidera mos katak desizaun ida ne'e involvimentu polítika maka'as liu.<sup>6</sup> Tanba ne'e ema hotu duvida funsionamentu ka kna'ar Konsellu Superior PNTL nian iha altura ne'eba la'o oinsa no involve duni iha prosesu hili Komandante Jeral PNTL ka lae?

Dadaun ne'e, hafoin Komandante Jeral PNTL nomea nu'udar Ministru Interior. Diskusaun no oponiaun fila fali namanas iha media nasional hotu-hotu, iha ne'ebé ho razaun katak nomeasaun ba Komandante Jeral tenki mai husi instituisaun PNTL rasik. Nune'e prosesu selesaun ba kandidatu Komandante Jeral PNTL la'o dadaun ona. Iha ne'ebé tuir publikasaun media nasional, Komandante Interinu Komisariu Polísia Afonso de Jesus hato'o katak Komandu Jeral PNTL prepara ona atu halo enkontru Konsellu Superior no hili figura ne'ebé kandidatu ba Komandante Jeral hodi apresenta ba Ministériu Interior.<sup>7</sup>

Nune'e opiniaun públiku dadaun ne'e diskute maka'as kona-bá figura ne'ebé maka sei asume kargu Komandante Jeral PNTL. Iha ne'ebé hateke ba figura sira iha Instituisaun PNTL nia laran ne'ebé ho kapasidade, kuiñesementu no esperiensa husi figura hirak ne'e.

Prezidenti Komisaun B Parlamentu Nasional David Diaz Ximenes hato'o katak Komandante Jeral PNTL foun labelle involve iha krime, korupsaun no mal-administrasaun. Sujere mos ema ne'ebé asume hanesan Komandante Jeral tenki hili liu husi ema rezistencia.<sup>8</sup>

Ministru Interior Dr. Longuinhos Monteiro ba media nasional kona-bá kandidatu ba Komandante Jeral PNTL sei halo identifikaun klaru ba kandidatu hotu-hotu. Portantu pozisaun ne'e desizaun politika nian no la'os kareira normal. Ida ne'e Ministériu Interior sei propoin ba Governu no desizaun husi Konsellu Ministru maka determina.<sup>9</sup>

<sup>6</sup> Kla'ak Semanal Edisaun 43 (24 Marsu 2009). Disponivel iha: <http://www.scribd.com/doc/13850066/Kla-ak-Semanal-Edisaun-43-24-Marsu-2009>. Asesu iha loran 2 fulan Marsu tinan 2015.

<sup>7</sup> Timor Post, loran 3 fulan Marsu tinan 2015. Pajina 3.

<sup>8</sup> Timor Post, loran 27 fulan Feveireu tinan 2015. Pajina 1 no 23.

<sup>9</sup> Jornal Nasional Diario, loran 20 fulan Feveireu tinan 2015. Pajina 14.



Opiniaun hanesan husi Diretor Assosiasaun HAK Manuel Monteiro hato'o katak figura ne'ebé sei asume kargu Komandante Jeral tenki mai husi Instituisaun PNTL nia laran. Iha ne'ebé figura ne'e kuiñese lei no natureza polisiais nian. Nune'e mos figura ne'ebé la involve iha krime, didikasaun diak, dixiplina no kuiñesementu diak hodi dezenvolve Instituisaun PNTL sai profesional.<sup>10</sup>

Nune'e ho idade PNTL nian 15, FM fiar katak membru sira durante ne'e iha Instituisaun PNTL nia laran, produs ona meritu akademiku, profesional no esperiensa komandu nian. Portantu ita hotu espera bele hetan figura ne'ebé iha integridade no kredibilidade ne'ebé aas hodi lidera Instituisaun PNTL.

Opiniaun ba prosesu ne'e mos konfirma ona husi Komandu PNTL rasik, Ministériu Interior, Parlamentu Nasional no sosiedade sivil sira. Tanba n'e atu hetan figura ida ne'ebé ho integridade no kredibilidade ne'ebé aas, iha prosesu selesaun ida ne'e prezisa involvê públiku nian hanoin kona-ba figura ne'ebé kandidatu ba Komandante Jeral PNTL. Liu-liu Parlamentu Nasional Komisaun B iha prosesu sira selesaun to'o dezizaun. Maske meius ida ne'e fora da lei nia haruka (Lei Organika PNTL) maibe ida ne'e hanesan meius polítika ida hodi hetan lejitimidade husi públiku, ne'e sorin ida.

Iha sorin seluk, FM husu avaliasaun dezempeñu ne'ebé Instituisaun PNTL halo to'o iha ne'ebé ona? Avaliasaun ida ne'e prezisa aplika iha prosesu selesaun ida ne'e nu'udar baze ba selesaun se maka kandidatu ba Komandante Jeral PNTL. Ida ne'e mos hanesan meius ida hodi konsidera serbisu ne'ebé durante ne'e membru PNTL sira kontribui ba Instituisaun PNTL no hanesan baze prinsipal ida hodi lidera no dezenvolve instituisaun ida ne'e sai profesional.

Pontu prinsipal ida ne'ebé Konsellu Superior PNTL no Ministériu Interior prezisa konsidera maka iha prosesu selesaun ne'e prezisa involve mos Komisaun Anti Korupsaun (KAK) no Ministériu Públiku. Objetivu atu involve komponente sira ne'e maka atu hare kandidatu ne'e nian *track record* iha ambitu kazu kriminal sira hanesan korupsaun no krime sira seluk.

Ho nune'e tuir kadru legal nasional nian haruka no hatur iha Lei Organika PNTL nian, nomeasaun ba Komandante Jeral PNTL nian Komisáriu ida ne'ebé hetan nomeasaun liu husi rezulusaun Konsellu Ministru, tuir proposta husi Ministru ne'ebé responsavel ba Siguransa hafoin simu pareser husi Konsellu Superior Polisia nian.<sup>11</sup>

Hatur mos iha iha artigu 13 Lei Organika PNTL nian kona-bá Konsellu superior Polisia nian sei iha responsabilidade hodi fó pareser nomeasaun Komandante Jerál no

---

<sup>10</sup> Jornal Independente, loran 26 fulan Feveireiru tinan 2015. Pajina 3.

<sup>11</sup> Dekretu Lei Nú. 9/2009, loran 18 fulan Feveireiru. Lei Organika Polisia Nasional Timor-Leste (PNTL). Artgiu 10) número 1).



Segundu Komandante Jerál nian.<sup>12</sup> FM fiar katak funksionamentu Konsellu Superior PNTL nian sei funsiona ho diak tuir lei nia haruka hodi hato'o pareser ba Ministériu responsável no la iha intervensaun polítika ruma ba prosesu inisiu ida ne'e. Maske ikus polítiku sira maka diside liu husi Konsellu Ministru.

Iha âmbito seluk, FM fiar katak Instituisaun PNTL iha ona rekursu ne'ebé naton hodi lidera instituisaun ne'e rasik. Maske sei iha obstaklu oin-oin iha prosesu dezvoltimentu instituisaun PNTL. Hanesan FM alerta tiha ona iha relatóriu dahuluk sira katak Instituisaun PNTL idade kiik maibe maduru iha responsabilidade.<sup>13</sup>

### **Ajenda prinsipal ba Komandante Jeral PNTL foun**

Ajenda prinsipal ida ne'e la sees husi Planu Estratejiku PNTL tinan 2014 – 2018. Portantu ida ne'e hatur ona mehi boot PNTL nian atu atinji iha tinan 2018. Komandu Jeral PNTL pasa tiha ona Planu Estratejiku PNTL tinan 2014 – 2018 ida ne'e iha tinan 2013. Iha ne'ebé sei hala'o reforma no dezvoltimentu iha PNTL no halo konsolidasaun ba ordem públika no siguransa komunitaria (objetivu rua Governu RDTL nian), no formula ona objetivu estratejiku lima iha Planu Estratejiku PNTL nian tinan 2014 – 2018.<sup>14</sup>

Objetivu rua Governu nian maka reforma no dezvoltimentu instituisaun no konsolida ordem públika no siguransa komunitaria. Iha asuntu reforma no dezvoltimentu instituisaun nian maka iha area lejislasaun, formasaun, administrasaun, dixiplina no operasaun. Nune'e mos konsolida ordem públika nian maka mantein siguransa, ordem públika no tranquilidade ne'ebé favorese ba estabilidade polítika no dezvoltimentu sosiu-ekonomiku Timor-Leste nian.<sup>15</sup>

Husi objetivu rua Governu nian ne'ebé formula iha PNTL nian objetivu estratejiku lima iha Planu Estratejiku PNTL nian tinan 2014 – 2018 maka iha kraik ne'e.

1. *Iha area lejislasaun nian, atu hasa'e kapasidade membru polisia nian liu husi hakbiit ba implmentasaun Lei Organika PNTL, estatutu pesoal, regulamentu internu, no Norma Organizasaun no Prosedimentu (NOP).*
2. *Iha area formasaun, atu hasa'e kapasidade teknika no profesional membru PNTL nian liu husi atividade formasaun.*
3. *Iha area administrasaun. Dezenvolve kapasidade PNTL nian atu jere rekurusu umanu, finanseiru, lojistiku, no informasaun komuikasaun no teknolojia (ICT) PNTL nian hodi permite apoiu ne'ebé adekua ba atividade polisiamentu nian.*

<sup>12</sup> Dekretu Lei Nú. 9/2009, loron 18 fulan FEVEREIRU. Lei Organika Polisia Nasional Timor-Leste (PNTL). Artgiu 13) número 5) alinea a).

<sup>13</sup> FM Kongratula PNTL: Hakat ba Idade XIII hahu La'o no Maduru iha Kna'ar. Disponivel iha: <http://www.fundasaunmahein.org/2013/03/26/fm-kongratula-pntl-hakat-ba-idade-xiii-hahu-la%E2%80%99o-ba-no-maduru-iha-knaar/>. Asesu iha loron 2 fulan Marsu tinan 2015.

<sup>14</sup> Planu Estratejiku PNTL tinan 2014 – 2018. Pajina 10.

<sup>15</sup> Planu Estratejiku PNTL tinan 2014 – 2018. Pajina 11.



4. *Iha area dixiplina nian. Dezenvolve PNTL nia kapasidade atu iha komportamentu ne'ebé responsavel no ho dixiplina.*
5. *Iha area operasaun nian. Mantein ordem públika no trankuilidade ne'ebé favorese ba estabilidade polítika no dezvoltimentu sosiu-ekonomiku Timor-Leste nian.*

FM fiar katak ajenda prinsipal ida ne'e sei realiza wainhira PNTL iha ulun boot ida ne'ebé kuiñese PNTL nia realidade durante ne'e. Portantu buat hirak ne'ebé hatur iha objetivu estrtaejiku PNTL nian ne'e maka realidade lolos husi situasaun sira durante ne'e sai hanesan eijjensia husi membru polisia sira no sosiedade tomak.

Komandante Jeral PNTL foun ezejuta PE PNTL 2014 – 2018, nu'udar hanesan bukaen ida ba PNTL hodi simu Planu PNTL 2030. Iha ne'ebé dadaun ne'e diskusaun hela iha Ministériu Interior hodi prepara Planu PNTL 2030.<sup>16</sup>

### **Rekomendasaun**

1. Rekomenda mos ba Ministrtu Interior iha prosesu sira selesaun involve mos KAK no Ministériu Públiku kona-bá *criminal record* figura ne'ebé kandidatu ba Komandante Jeral PNTL.
2. Kandidatu ne'ebé nomea ona nu'udar Komandante Jeral PNTL husi Konsellu Ministru presiza deklara nia riku soin ba KAK.

---

<sup>16</sup> Intervensaun Sekretaria Estadu ba Siguransa Dr. Francisco Guterres iha enkontru ho parseiru dezvoltimentu sira *Timor-Leste Community Policing Programme (TLCPP)*, *The Asia Foundation (TAF)* no USAID nia tulun kona-bá polisiamentu komunitaria iha Timor-Leste. Iha salaun Serbisu Migrasaun, Vila Verde – Dili iha tinan 2014.



## Bibliografia

Dekretu Lei Nú. 9/2009, leron 18 fulan Feveiru. Lei Organika Polisia Nasional Timor-Leste (PNTL).

FM Kongratula PNTL: Hakat ba Idade XIII hahu La'o no Maduru iha Kna'ar. Disponivel iha: <http://www.fundasaunmahein.org/2013/03/26/fm-kongratula-pntl-hakat-ba-idade-xiii-hahu-la%E2%80%99o-ba-no-maduru-ih-knaar/>. Asesu iha leron 2 fulan Marsu tinan 2015.

Intervensaun Sekretaria Estadu ba Siguransa Dr. Francisco Guterres iha enkontru ho parseiru dezenvolvimentu sira *Timor-Leste Community Policing Programme* (TLCPP), *The Asia Foundation* (TAF) no USAID nia tulun kona-bá polisiamentu komunitaria iha Timor-Leste. Iha salaun Serbisu Migrasaun, Vila Verde – Dili iha tinan 2014.

Jornal Independente, leron 26 fulan Feveiru tinan 2015.

Jornal Nasional Diario, leron 20 fulan Feveiru tinan 2015.

Kla'ak Semanal Edisaun 43 (24 Marsu 2009). Disponivel iha: <http://www.scribd.com/doc/13850066/Kla-ak-Semanal-Edisaun-43-24-Marsu-2009>. Asesu iha leron 2 fulan Marsu tinan 2015.

Planu Estratejiku PNTL tinan 2014 – 2018.

Xefe Estadu Simu Proposta husi Primeiru Ministru Indijitadu, Dr. Rui Maria de Araújo, kona-ba Kompozisaun Governu nian. Disponivel iha: <http://presidenciarepublica.tl/xefe-estadu-simu-proposta-husi-primeiru-ministru-indijitadu-dr-rui-maria-de-araujo-kona-ba-kompozisaun-governu-nian/>. Asesu iha leron 2 fulan Marsu tinan 2015.

Timor Post, leron 3 fulan Marsu tinan 2015.

Timor Post, leron 27 fulan Feveiru tinan 2015.